

Imaani avatangiisit illersorneqarnissaat pillugu Inatsisartut peqqussutaat

Kalaallit Nunaanni avatangiisit il.il. pillugit inatsit nr. 850, 21. december 1988-imeersoq, inatsisikkut Kalaallit Nunaanni avatangiisit pillugit inatsinik arlalinnik allanngortitsisukkut nr. 921-kkut 25. november 1992-imeersukkut allannguuteqartinneqartoq, tunngavigalugu makku aalajangersarneqarput:

Kapitali 1.

Aalajangersakkat aallarnisaataasut.

§ 1. Inatsisartut peqqussutaat manna pinngortitap avatangiisillu illersorneqarnissaannut peqataassaaq, taamaalilluni inuiaqatigiit ineriartornerat nungusaataanngitsumik tunngaveqarluni inuillu inuunermi atugarisaat ataqqillugit kiisalu uumasut naasullu nungutsaalineqarnissaat siunertaralugu ingerlanneqarsinnaaqqullugu.

Imm. 2. Inatsisartut peqqussutaatigut matumuuna pingaartumik anguniarneqarpoq imaatigut avatangiisit umiarsuarnit silaannakkoortatinillu imerpalanngitsunik, imerpalasunik, allanngortitanik allatulluunniit ilusilinnik ikummatilinnit mingutsinneqarsinnaanerisa pitsaaliorneqarnissaat,

- 1) inuup peqqissusianut ulorianartorsiortitsinnaasumik
- 2) imaani pisuussutinik uumassusilinnik uumassusilinnillu allanik ajoqusiisinnaasumik
- 3) pisinnaatitaaffik naapertorlugu immap atorluarneqarneranut akornutaasinnaasumik, imaluunniit
- 4) sukisaarsaartarfusinaasutut nalilinnut akornutaasinnaasumik.

Imm. 3. Inatsisartut peqqussutaata matuma imaani umiarsualivinnilu mingutsisinnaanermut akiuinissamut upalungaarsimanerup ataavartinneqarnissaa qulakkiissavaa.

§ 2. Inatsisartut peqqussutaat manna immamut sinerissamiit avammut 3 sØmilit avasitsigisoq tikillugit atuuppoq, tamanna imatut paasineqassalluni Kalaallit Nunaata imartaani basisliniamiit nunap tungaanut kiisalu basisliniamiit avammut killeqarfiup killeqpiaanut, 3 sØmilinik silissuseqartuaannaartoq.

§ 3. Inatsisartut peqqussutaanni matumani umiarsuit silaannakkoortaatillu makku pineqarput:

- 1) kalaallit qallunaallu umiarsuaataat kiisalu umiarsuit allat Kalaallit Nunaata imartaaniittut,
- 2) kalaallit qallunaallu silaannakkoortaatat kiisalu silaannakkoortaatit allat Kalaallit Nunaata imartaaniittut imartalluunniit tamatuma qulaaniittut.

Imm. 2. Inatsisartut peqqussutaanni matumani umiarsuit sorsuutit umiarsuillu allat naalagaaffimmit atorineqartut pineqanngillat umiarsuit taakku naalagaaffimmit aningaasannanniutaanngitsuinnarnut atorineqartillugit.

§ 4. Inatsisartut peqqussutaanni matumani "imaarsineq" tassaatinneqarpoq umiarsuit nalinginnaasumik ingerlanneqarnerannut atatillugu atortunik stoffinilluunniit imaanut kuutsitsineq, saavitsitsineq igitinerluunniit suugaluartoq.

Imm. 2. Inatsisartut peqqussutaanni matumani "eqqaaneq" tassaatinneqarpoq stoffinik atortunillu umiarsuarnit timmisartunilluunniit imaluunniit umiarsuarnik timmisartumilluunniit imaanut eqqaaneq suugualartorluunniit, matumani stoffinik atortunillu eqqagassatut umiarsuarmiitinneqartunik timmisartumiitinneqartunilluunniit kuutisineq, saavititsineq eqqaanerlu sunaluunniit - imaarsinertut isigineqarsinnaanngitsoq.

Imm. 3. Imaarsinertut eqqaanertulluunniit isigineqanngillat stoffinik atortussanilluunniit imaanut inissiinerit, inissiineq eqqaanermit allaanerusumik siunertaqarluni pisimappat.

§ 5. Mingutsitsinermik akuiniarnermi ilisimatuussutsikkut misissuinissaq siunertaralugu imaaniluunniit mingutsitsinerup akiorneqarnissaa siunertaralugu stoffinik atortussanilluunniit allanik imaanut kuutsitsisoqassanngilaq Naalakkersuisut taamaaliornissamut akuersissuteqareersimatinnagit.

Imm. 2. Pisuni ataasiakkaani imaluunniit pissutsit immikkut ittut atuutsillugit piffissami erseqqinnerusumik killilerneqarsimasumi *imm. 1* malillugu taamaallaat akuersissuteqartoqarsinnaavoq. Akuersissununi oqaatigineqassaaq stoffit atortussalluunniit suut akuersissummi ilaatinneqarnersut, taakku katillutik qanoq annertutigissanersut kiisalu qanoq ililluni toqqortarineqassanersut, piffissanilu aalajangersimasuni nakkutilliinermut atatillugu misissugassanik tigooraasoqartassanersoq nalunaarusiortoqartassanersorlu.

§ 6. Kalaallit Nunaata imartaani avatangiisinik illersuinissaq siunertaralugu malittarisassanik aalajangersaaneq kiisalu pisuussutinik uumaatsunik misissueqqaarnernut, ujarlernernut atuinermullu atatillugu avatangiisinut pingaaruteqartumik aqqiisarnerit nakkutilliinerlu, matumani aatsitassat ilanngullugit, peqqussummi matumani ilaatinneqanngillat, ingerlatanilli taamaattunik ingerlatsinissamut pisinnaatsisinermut akuersissuteqarnermulluunniit atatillugu inatsisit manna tikillugu atorneqartut tunngavigalugit pisassalluni, kiisalu suliassat taakku oqartussanit ataatsimut suliarineqarnerannut ilaatillugu pisassalluni.

Kapitali 2.

Uulia.

§ 7. Peqqussummi matumani "Uulia" tassaatinneqarpoq uuliat suulluunniit taassuminngalu akuukkat, matumani uulia salinneqanngitsoq, gassi imerpalasoq pinngortitap pilersitaa, uuliap kinnerlukui uuliamillu igitassat, kiisalu uulia ikummatissaq uuliallu salinneqarnerani atortussiat allat tamarmik, petrokeitiikaliat § 10 tunngavigalugu immikkoortillugit nassuiarneqarsimasut eqqaassanngikkaanni.

Imm. 2. "Umiarsuaq uuliamik assartuut" tassaatinneqarpoq umiarsuaq uuliamik assartuinissaq siunertaralugu aqqissuunneqarsimasoq, imaluunniit uuliamik annertoorsuanngorlugu assartuinerimi atorneqartoq.

§ 8. Kalaallit Nunaata imartaani umiarsuarniit silaannakkoortaatiniilluunniit uuliamik imaarsisoqassanngilaq.

§ 9. Umiarsuarni uuliamik assartuutini suniluunniit 150 BRT-itut taannaluunniit sinnerlugu oqimaassusilinni umiarsuarnilu allani tamani 400 BRT-itut taannaluunniit sinnerlugu oqimaassusilinni uuliamik orsersorneqartartumi uuliap atorneqarnera pillugu nalunaarsuusiortoqartassaaq.

Imm. 2. Nalunaarsuusiorneq taassumalu ilusilernerqarnera pillugit Naalakkersuisut erseqqinnerusunik malittarsisassaliussapput Kalaallit Nunaata imartaata avataani malittarisassanut atuuttunut naapertuuttunik.

Imm. 3. Oqartussat § 36-mi taaneqartut naalagaaffimmiluunniit oqartussat pisussaasut umiarsuarniit mingutsitsinermik pitsaaliunissaq pillugu isumaqatigiisummik akuersisimasut piumasaqarnerisigut

umiarsuup piginnittaata, atuisup umiarsuulluunniit naalagaata nalunaarsuiffik takutissavaa, taassumalu assilineqarneri akuerisaasut nalunaarutigalugit.

Kapitali 3.

Stoffit imerpalasut annertoorsuanngorlugit assartorneqartartut.

§ 10. Inatsisartut peqqussutaanni matumani "stoffit imerpalasut" tassaatinneqarput stoffit kissassutsimi 37,8° C-imi aalanngorlutik 2,8 kp/cm² sinnerlugu naqitsineqalertaanngitsut.

Imm. 2. Stoffinut imerpalasunut annertoorsuanngorlugit assartorneqartartunut immikkoortillugit nassuiaatit pillugit Naalakkersuisut malittarisassaliussapput, stoffillu imerpalasut immikkoortillugit nalunaarsorneqarfiannik allattuiffiliussallutik Kalaallit Nunaata imartaata avataani malittarisassanut atuuttunut naapertuuttunik.

Imm. 3. Kalaallit Nunaata imartaani stoffinik imerpalasunik annertoorsuanngorlugit assartorneqartartunik imaarsisoqassanngilaq, imeq allamik akoqanngitsoq eqqaassanngikkaanni.

§ 11. Stoffit imerpalasut, uulia § 10 tunngavigalugu immikkoortillugu nalunaarsorneqarsimanngitsoq eqqaassanngikkaanni, Kalaallit Nunaanni umiarsualivimmit imaluunniit umiarsualivimmut annertoorsuanngorlugu assartorneqannginnerminni utaqqiisaagallartumik immikkoortillugit nalunaarsorneqassapput.

§ 12. Umiarsuarni stoffinik imerpalasunik annertoorsuanngorlugit assartuinissamut naleqqussakkani assartuisuniluunniit (kemikalietankskibe) stoffit imerpalasut § 10 tunngavigalugu ajoqusiisinaasutut immikkoortillugit nalunaarsorneqarsimasut pillugit nalunaarsuusiortoqassaaq.

Imm. 2. Nalunaarsuusiorneq taassumalu ilusilernerqarnera pillugit Naalakkersuisut erseqqinnerusunik malittarisassaliussapput Kalaallit Nunaata imartaata avataani malittarisassanut atuuttunut naapertuuttunik.

Imm. 3. Oqartussat § 36-mi taaneqartut piumasaqarnerisigut umiarsuup piginnittaata, atuisup umiarsuulluunniit naalagaata nalunaarsuiffik takutissavaa, taassumalu assilineqarneri akuerisaasut nalunaarutigalugit.

§ 13. Imerkik tankinut saligutaasumik usingiarneq imaarsinerlu pillugit malittarisassat aalajangersakkallu malinneqarnerinik nakkutilliineq pillugu malittarisassat Naalakkersuisunit aalajangersarneqassapput. Inunnik nakkutilliinermik ingerlatsisussanik toqqaaneq piginnaatitsinerlu pillugit malittarisassat Naalakkersuisunit aalajangersarneqassapput.

Kapitali 4.

Poortuusissat assigiinngitsut, containerit il.il. atorlugit stoffit atorussallu poortorneqarsimasut.

§ 14. Kalaallit Nunaata imartaata illersorneqarnissaa siunertaralugu Naalaakkersuisut malittarisassanik erseqqinnerusunik aalajangersaasinnaapput, imaluunniit stoffit atorussallu ajoqusiisinnaasut poortuutissanik assigiinngitsunik, containerinik il.il. poortorneqarsinallutik assartorneqarneri pillugit aalajangiisinnaallutik, matumani siumut ilisimatitsissuteqartarneq ilanngullugu.

Kapitali 5.

§ 15. Kalaallit Nunaata imartaata illersorneqarnissaa siunertaralugu stoffit manngertut annertoorsuanngorlugit assartorneqartartut immikkoortillugit nalunaarsorneqarnissaat pillugu Naalaakkersuisut malittarisassanik aalajangersaasinnaapput, kiisalu stoffinik ajoqusiisinnaasunik

imaarsisoqannginnissaanik imaluunniit immikkut piumasaqaataasut aatsaat eqqortillugit imaarsisoqarsinnaanera pillugu malittarissanik aalajangersaasinnaallutik. Stoffit immikkoortillugit nalunaarsorneqarsimasut pillugit Naalakkersuisut allattuiffiliortitsisinnaapput.

Kapitali 6.

Imeq eqqakkat kuuffineersaq.

§ 16. Imermik umiarsuit eqqakkanik kuuffineersumik imaarsisarneq pillugu malittarisassanik Naalakkersuisut aalajangersaasinnaapput, matumani umiarsualivinni, kangerliumanerni, kangerlunni taakkulu assigisaanni imaarsinissamik inerteqquteqarneq ilanngullugu.

Kapitali 7.

Igitassat.

§ 17. Kalaallit Nunaata imartaani igitassanik imaarsisoqassanngilaq, aalisakkat nutaat taakkulu perlukui eqqaassanngikkaanni.

Kapitali 8.

Tigooraaviit.

§ 18. Uuliakunik stoffinillu imerpalasunik ajoqusiisinnaasunik kiisalu igitassanik umiarsualivinni tigooraaviit pilersinneqarneri aaqqissuunneqarnerilu pillugit Naalaakkersuisut malittarisassanik aalajangersaassapput aalajangiillutillu. Matumani ilanngullugu aalajangerneqarsinnaavoq umiarsuarnik orsersuisarfiit, suliffeqarfiit usingiaasartut uuliamilluunniit tigooraasartut, imalluunniit usingiaassartut stoffinilluunniit imerpalasunik ajoqusiisinnaasunik tigooraasartut kiisalu umiarsuarnik iluarsaassisarfiit imermik uuliakumik kemikalianillu akulimmik imermillu ballasteqarfinnut tankinullu saligutaasimasumik tigooraavissanik pilersitseqqullugit peqquneqassasut.

Kapitali 9.

Eqqaaneq.

§ 19. Kalaallit Nunaata imartaani stoffinik atortussanillu eqqaasoqassanngilaq. Taamaattorli aalisakkanik aalisakkallu perlukuinik immallu naqqaneersunik qaqitanik eqqaaneq, kiisalu nakkutigineqartumik angallatinik kiversaaneq Naalakkersuisut akuersissutigisinnaavaat.

§ 20. Aalisakkanik aalisakkallu perlukuinik eqqanissamut akuersissuteqartoqartassaaq eqqaavigineqartussami pissutsit erseqqissumik naliliivigineqareernerisigut.

Imm. 2. Angallatit imaanut kiversarneqarnissaannik taamaallaat akuersissuteqartoqarsinnaavoq pissutsit immikkut ittut atuutsillugit, pisuni erseqqissuni ataasiakkaani, angallatillu kiversarneqartussat stoffinik avatangiisinut ulorianarsinaasunik tamanik imaarneqareersimappata.

Imm. 3. Inunap naqqanit qaqitanik eqqaanissamut akuersissuteqartoqartassaaq qinnuteqaatip naliliiffigineqareerneratigut, qinnuteqaatillu ataasiakkaat tamarmik immikkut erseqqissumik naliliiffigineqareernerisigut.

§ 21. § 20 tunngavigalugu akuersissummi nalunaarsimassaaq stoffit atortussalluunniit suut akuersissummi ilaatinneqarnersut, taakku annertussusiat kiisalu eqqaavissap sumiissuserpaa. Qanoq periuseqarluni eqqaanissaaq eqqarsaatigalugu aamma piumasaqaateqartoqarsinnaavoq, matumani nakkutilliineq isumannaallisaanerlu, iliuusissat nalunaaruteqarnissarlu ilanngullugit eqqarsaatigalugit.

Imm. 2. § 20 tunngavigalugu akuersissut allakkatigut qinnuteqartumut kiisalu oqartussanut suliap suliarineqarnerani peqataatinneqarsimasunut nalunaarutigineqassaaq. Akuersissummik nalunaaruteqarneq inuinnarnut aalajangiinermut annertuumik soqutigisaqarsinnaasorinartunut aamma nalunaarutigineqassaaq, tamannalu tamanit atuarneqarsinnaasumik annonceliinikkut pisinnaavoq.

§ 22. Eqqaanissamut akuersissummik tunniussisoqareersimatinnagu stoffit atortussalluunniit eqqaanissaq siunertaralugu assartugassanngorlugit tunniunneqarnissaat, assartorneqarnissaat usilersuunneqarnissaalluunniit inerteqqutaavoq.

§ 23. §§ 19 - 22 tunngavigalugit eqqaaneq pillugu Naalakkersuisut malittarisassanik erseqqinnerusunik aalajangersaasinnaapput.

Kapitali 10.

Imaanik allatigut mingutsitsineq.

§ 24. Kalaallit Nunaata imartaani stoffinik atortussanilluunniit ikuallaasoqassanngilaq.

Imm. 2. Imaani ikuallaanissaq siunertaralugu stoffit atortussalluunniit assartugassanngorlugit tunniunneqarnissaat, assartorneqarnissaat usilersuunneqarnissaalluunniit inerteqqutaavoq.

Imm. 3. Imm. 1 - 2-mi aalajangersakkat umiarsuit nalinginnaasumik ingerlanneqarneranni eqqagassanngortut ikuallanneqarnertarnerat eqqarsaatigalugu atuutinngillat.

Imm. 4. Imm. 3-mi pineqartunut malittarisassanik Naalakkersuisut aalajangersaasinnaapput.

§ 25. Kalaallit Nunaata imartaata illersorneqarnissaa siunertaralugu umiarsuarnit silaannarmik mingutsitsinerup killilersimaarneqarnissaa siunertaralugu immikkut iliuusissat pillugit Naalakkersuisut malittarisassanik erseqqinnerusunik aalajangersaasinnaapput, matumani orsussaq eqqarsaatigalugu piumasaaqatit ilanngullugit.

§ 26. Nukissamik, stoffinik atortussanilluunniit kapitalini 2-7-imi, 9-mi kiisalu kapitali 10-mi ilaatinneqanngitsunik Kalaallit Nunaata imartaanik mingutsisinaveersaarnissaq mingutsitsinnginnissarlu siunertaralugit Naalakkersuisut malittarisassanik aalajangersaasinnaapput.

Kapitali 11.

Upalungaarsimaneq.

§ 27. Kalaallit Nunaata imartaani uuliamik akoorutissanillu (kemikalier) mingutsitsinermik akiuineq Naalakkersuisunit oqartussanillu allanit Naalakkersuisunit tamatumunnga piginnaatinneqartunit isumagineqartussaavoq.

Imm. 2. Uuliamik akoorutissanilluunniit mingutsisisoqarsimatillugu sinerissamik saliineq kommunalbestyrelsimit ingerlanneqassaaq.

Imm. 3. Imm. 1-imi aamma 2-mi taaneqartut Kalaallit Nunaata imartaani pisuussutinik uumaatsunik misissuinerlut atuinermullu atatillugu uuliamik akoorutissanillu mingutsitsinermik akiuinermit atuutinngillat. Taamatut pisoqartillugu pisariaqartunik iliuuseqarnissaq Energiministerip isumagissavaa.

Imm. 4. Imm. 1 tunngavigalugu upalungaarsimanissamut pilersaarutit Naalakkersuisut suliarissavaat, imm. 2-milu oqartussat taaneqartut upalungaarsimanissamut pilersaarusiioqqullugit peqqusinnaallugit.

§ 28. Umiarsuit uuliamik assartuutit 150 BRT-itut tassanngaluunniit oqimaannerusut tamarmik umiarsuillu allat 400 BRT-itut tassanngaluunniit oqimaannerusut tamarmik umiarsuarmit ajutoornikkut uuliamik mingutsitsisinnanermut upalungaarsimanissamut pilersaarummik akuerineqarsimasumik peqassapput.

Imm. 2. Umiarsuit 150 BRT sinnerlugu oqimaassusillit stoffinik imerpalasunik ajoqusiisinnaasunik

annertoorsuanngorlugit assartuinissamut aaqqissuussat stoffinilluunniit taamaattunik
annertoorsuanngorlugit assartuisut upalunaarsimanissat pilersaaruteqarnissat pillugu Naalakkersuisut
malittarisassanik aalajangersaasinnaapput.

Kapitali 12.

Nalunaaruteqartarneq.

§ 29. Kapitalinut 2-7-mi aalajangersakkanik unioqutitsisumik imaluunniit § 40-mi ilaatinneqartunik
imaarsisoqarpat umiarsuarmik piginnittut, atuisut, umiarsuit naalagaat kiisalu ilisimasortat
Naalakkersuisunut ingerlaannartumik nalunaaruteqassapput. Kiisalu qanorluunniit ittumik
ikkarlittoqartillugu, imaluunniit allamik patsiserqartumik imaarsinissaq ilimagineqarpat tamanna
ingerlaannaq aamma nalunaarutigineqassaaq.

Imm. 2. Inuit imm. 1-imi taaneqartut kiisalu silaannakkoortaatini naalagaasut uuliamik imaluunniit stoffinik
imerpalasunik ajoqusiisinaasunik mingutsitsisoqarneranik umiarsuarmiit silaannakkoortaammilluunniit
malugisaqarunik ingerlaannaq Naalakkersuisunut nalunaaruteqassapput.

Imm. 3. Umiarsualivimmi uuliamik stoffinilluunniit imerpalasunik ajoqusiisinaasunik annertuumik
maangaannaq kuutsitsinermik malugisaqaruni umiarsualivimmi oqartussaasoq Naalakkersuisunut
ingerlaannaq nalunaaruteqassaaq.

Imm. 4. Imin. 1-3-imi taaneqartutut pisoqartillugu tassani inuit taaneqartut Naalakkersuisunit § 27-imilu
oqartussanit taaneqartunit piumaffigineqarnermikkut immamik mingutsitsinissaq pinngitsoortinniarlugu
mingutsitsinerluunniit akiorniarlugu iliuuseqarnissanut paasissutissat pingaaruteqartut tamaasa
nalunaarutigissavaat.

§ 30. Assartuutunik piginnittut, atuisut taakkulu naalagaat akuersisummik pigisaqaratik imaanut
eqqaasimagunik imaaniluunniit ikuallaasimagunik tamanna Naalakkersuisunut ingerlaannartumik
nalunaarutigissavaat.

§ 31. §§ 29-imi aamma 30-mi aalajangersakkat malitsinneqarnissat pillugu malittarisassat
erseqqinnerusut Naalakkersuisut aalajangersarsinnaavaat.

Imm. 2. Imaanik allatut mingutsitsinerit §§ 29-mi aamma 30-mi ilaatinneqanngitsut
nalunaarutigineqartarnissat pillugu Naalakkersuisut malittarisassanik aalajangersaasinnaapput.

§ 32. Stoffit atortussalluunniit umiarsualivinni usilersuunneqartut usingiarneqartullu katitigaanerat
annertussuiallu pillugit nioqquteqartut, eqqussuisut, avannut nioqquteqartut, assartuisut
umiarsualivinnilu oqartussat nalunaaruteqartarnissaannut malittarissasanik Naalakkersuisut
aalajangersaasinnaapput.

Kapitali 13.

Akuliunneq.

§ 33. Kinaassutsimik eqqortumik uppersaasiinikkut eqqartuussivik aalajangiisinngikkaluarlugu
Naalakkersuisut oqartussallu § 36-mi taaneqartut umiarsuarmik immap mingutsinneqarnissaa
pinngitsoortinniarlugu mingutsitsinermilluunniit akiuinissaq siunertarlugu pisariaqartinneqartumik
misissuisinnaapput umiarsuarmiit imaarsisoqarsinappat imaarsinissarlunniit ulorianarsorinarpat,
tamannalu kapitalini 2-7-imi aalajangersakkanik imaluunniit § 26 tunngavigalugu maleruaqqusanik
unioqutitsineruppat, § 40-miluunniit ilaatinneqarpat. Misissuineq umiarsuup pisariaqanngitsumik
kinguaattoorneranik pisariaqanngitsumilluunniit aningaasartuuteqarneranik kinguneqassanngilaq.

§ 34. Naalakkersuisut oqartussallu § 36-mi taaneqartut umiarsuup ingerlaqqinnissaa umiarsuarmiluunniit ingerlatat allat ingerlateqqinneqarnissaat inerteqqutigisinnaavaat, imaluunniit peqqussutigisinnaallugu umiarsuup ingerlaarnererani ingerlatanilluunniit allanik ingerlatsinermi tunaartarisasat aalajangersimasut malinneqassasut; taamaaliortoqarsinnaavoq umiarsuarmit imaarsisoqarsimappat imaluunniit imaarsisoqarnissaa ulorianaateqarpat kapitalinut 2-7-imi aalajangersakkanik imaluunniit § 26 tunngavigalugu maleruaqqusanik unioqqutitsisumik imaluunniit § 40 ilaatinneqartunik, inerteqqullu imaluunniit peqqussut imaanik mingutsitsisinaanermik pitsaaliuinissaq mingutsitsinermilluunniit akiuinissaq siunertaralugu pisariaqartinneqarpata.

Imm. 2. Oqartussat imm. 1-imi taaneqartut imm. 1-imi taaneqartunit annertunerusunik iliuuseqartoqarnissaanik aalajangiisnaapput, mingutsitsinermik imaani avatangiisinik annertuumik ajoqusiisnaasumik pitsaaliuinissaq akiuinissarlunniit siunertaralugit taamaaliornissaq pisariaqartinneqarpata.

Imm. 3. Imm. 1-2 tunngavigalugit inerteqquteqarnissamik peqqussuteqarnissamilluunniit aalajangernerit umiarsuup naalagaannut, piginnittaanut atuisumilluunniit allakkatigut telegrafiluunniit atorlugu piaarnerpaamik nalunaarutigigineqassapput, inerteqquteqarnermut peqqussuteqarnermulluunniit tunngavigineqartut nalunaarutigineqarnerannik ilaqartillugu, umiarsuarlu aallaqqusaajunnaarsimappat aallaqqissinnaalernissaanut suut piumsaqaataanersut ilanngullugit nalunaarutigineqassallutik.

§ 35. Imaarsisoqarsimappat imaluunniit imaarsisoqarnissaa ulorianaateqarpat kapitalinut 2-7-imi aalajangersakkanik imaluunniit § 26 tunngavigalugu maleruaqqusanik unioqqutitsisumik imaluunniit § 40 ilaatinneqartumik, imaarsinerullu kingunerisaanik upalungaarsimanissaq mingutsitsinermilluunniit akiuineq pissutigalugu aningaasartuuteqartoqarsimappat aningaasartuutit taamaattut pisariaqartumik iliuuseqarnermut tamanut aningaasartuutaasimasut umiarsuup piginnittaanit aningaasartuutigineqassapput.

Imm. 2. Naalaakkersuisut oqartussallu imm. 1-imi taaneqartut umiarsuarmik piginnittoq peqqusinnaavaat aningaasartuutitut imm. 1-imi taaneqartunut qularnaveeqqusiissasooq, aalajangiisnaallutillu qularnaveeqqusiisoqarnissaata tungaanut umiarsuaq aallaqqusaassanngitsoq. § 34, inun. 3-mi aalajangersakkat aamma atortinneqassapput.

Kapitali 14.

Nakkutilliineq.

§ 36. Inatsisartut peqqussutaanni matumani aalajangersakkat malittarisassallu taanna tunngavigalugu aalajangersarneqarsimasut malinneqarnerisa nakkutigineqarnerat pillugu Naalakkersuisut malittarisassaliorsinnaapput.

Imm. 2. Inatsisartut peqqussutaanni matumani aalajangersakkat malittarisassallu Inatsisartut peqqussutaat manna tunngavigalugu aalajangersarneqarsimasut malinneqarnerat Illersornissaqarfup Aalisarnermik Nakkutilliisoqarfianit politiiinillu nakkutigineqassaaq.

Imm. 3. Kinaassutsimik eqqortumik uppersaasiinikkut eqqartuussivik aalajangiisnngikkaluarlugu imm. 1-imi aamma 2-mi oqartussat taaneqartut umiarsuarmik pappialaataanillu misissuisinnaapput, kiisalu misissugassanik tigussillutik, taamaaliornermikkut Inatsisartut peqqussutaat manna malittarisassallu taanna tunngavigalugu aalajangersarneqartut malinneqarnerisut paasiniarlugu. Misissuineq umiarsuup pisariaqanngitsumik kinguaattoorneranik pisariaqanngitsumilluunniit aningaasartuuteqarneranik kinguneqassanngilaq.

Imm.4. Nunat allat umiarsuaataat aqquusaaginnartut eqqarsaatigalugit imm. 1-3 tunngavigalugit piginnaatitaaffliinnerit taamaallaat atortinneqarsinnaapput Inatsisartut peqqussutaannik matumanna malittarisassanillu taanna tunngavigalugu aalajangersakkanik unioqqutitsisoqarneranik pissutissaqavissumik pasitsaassisoqarsimappat.

§ 37. Umiarsuit uuliamik assartuutit usisaataasa tankit misissorneqartarnissaat pillugit malittarisassanik Naalakkersuisut aalajangersaasinnaapput paasiniarlugu usingiarnermi kinnganikut siusinnerusukkut uuliamik usigisimasat imaarsinerillu pillugit paasissutissiissutinut naapertuuttuunersut. Matumani ilanngullugu aalajangerneqarsinnaavoq misissuineq kinaassutsimik eqqortumik paasissutissiinnikkuq eqqartuussivimmit aalajangiivigineqanngikkaluamik ingerlanneqarsinnaasoq.

Imm. 2. Naalaakkersuisut malittarisassanik erseqqinnerusunik aalajangersaasinnaapput kalaallit, qallunaat nunallu allat umiarsuaataanni Kalaallit Nunaata imataaniittuni imaarsinernut peqqussut manna malillugu allatulluunniit mingutsitsinissaq eqqarsaatigalugu unioqqutitsisumik imaarsinernut maluginninniutaasinnaasunik atortulersuisoqassasoq.

Kapitali 15.

Ataatsimiititaq naaimagittaalliuuteqartarfik.

§ 38. Avatangiisit illersorneqarnissaat pillugu Inatsisartut peqqussutaat nr. 12 22. december 1988-imeersoq kingusinnerusukkut Inatsisartut peqqussutaatigut nr. 7-ikkut 13. maj 1993-imeersukkuq allanngortinneqartoq tunngavigalugu ataatsimiititaq naammagittaalliuuteqartarfittut pilersinneqarsimasoq Inatsisartut peqqussutaat manna tunngavigalugu aalajangiinernut naammagittaalliuuteqartarfuvoq, avatangiisillu illersorneqarnissaat pillugu Inatsisartut peqqussutaanni nr. 12-imi 22. december 1988-imeersumi Inatsisartut peqqussutaatigut nr. 7-ikkut 13. maj 1993-imeersukkuq allanngortinneqarsimasumi § 10-mi ataatsimiititap naammagittaalliuuteqartarfiup sulinera pillugu malittarisassat atuutissapput.

Kapitali 16.

Aalajangersakkat allat.

§ 39. Akuersissutit Inatsisartut peqqussutaat manna inatsisilluunniit Inatsisartut peqqussutaata matuma atorunnaarsitai tunngavigalugit nalunaarutigineqarsimasut sukkulluunniit allanngortinneqarsinnaallutilluunniit atorunnaarsinneqarsinnaapput Kalaallit Nunaata imartaanik illersuinissap taamaaliornissaq pisariaqalersippagu.

§ 40. Kapitalini 2 - 7-imi kiisalu 9-mi aamma 10-mi aalajangersakkat kiisalu maleruaqqusat aalajangersakkat taakku tunngavigalugit atulersinneqartut atuutissanngillat

1) imaarsineq eqqaanerluunniit inuup inuuneranik annaassiniarneq imaluunniit umiarsuup silaannakkoortatilluunniit isumannaatsuunissaa siunertarlugu pisimappata, imaluunniit
2) kuutsitsineq umiarsuup ajoquserneranik, umiarsuup atortuisa ajoqusernerannik umiarsuulluunniit pinngitsoorneqarsinnaanngitsumik alittoorneranik patsiseqarpat, ajoqusernerullu imaluunniit alinnerup paasineqarnerata kingorna kuutsitsinissaq pinngitsoortinniarlugu millisinniarluguluunniit iliuuserisariaqartut tamarmik iliuuserineqarsimappata, mingutsisinerlu umiarsuarmik piginnittup, atuisup, umiarsuup naalagaata, allalluunniit umiarsuarmi sulianik ingerlataqartut mianersuaalliornerisigut pisimanngippat, ajoqusersinnaanerluunniit siumut naatsorsuutigereersimasinnaanngippassuk.

Kapitali 17.

Pineqaatissiisarneq atortuulersitsinerlu pillugit aalajangersakkat.

§ 41. Pillaammik akiliisussanngortitsisoqarsinnaavoq

1) § 5 imm. 1-imik, § 8-mik, § 9 imm. 1-imik aamma 3-mik, § 10 imm. 3-mik, § 17-imik, § 19-imik, § 22-mik kiisalu § 24 imm. 1-imik aamma 2-mik unioqqutitsisunut,

2) § 11-mi aamma § 15-imi piumasarineqartutut immikkoortillugit nalunaarsuutitik pissarsiniangitsoortunut,

3) § 5 imm. 2, § 20 aamma § 21 imm. 1 tunngavigalugu akuersissutitut atatillugu atugassarititaasunik sumiginnaasunut,

4) § 29 imm 1-3 aamma § 30 malillugit nalunaaruteqanngitsoortunut, imaluunniit § 29 imm. 4 malillugu paasissutissanik nalunaaruteqanngitsoortunut,

5) § 34 imm. 1 aamma 2 tunngavigalugit inerteqqummut peqqussunulluunniit naalanngitsunut,

6) § 33 tunngavigalugu misissuinernik, imaluunniit § 36 imm. 2-3 tunngavigalugit nakkutilliinermut atatillugu misissuinernik akornusersuisunut,

7) § 35 imm. 2 tunngavigalugu aallaqqusinnginnermut akornusersuisunut.

§ 42. § 8, § 10 imm. 3, § 19 aamma § 24 imm. 1 unioqqutinneqarpata umiarsuarmik piginnittoq

atuisorluunniit pillaammik akiliisussanngortitsinermut akisussaasunngortinneqarsinnaavoq, naak

unioqqutitsineq taassuma piaaraluneerneratut mianersuaallioneratulluunniit

isigineqarsinnaanngikkaluartoq. Pillaammik akiliisussanngortitaanermut taamatut

akisussaasunngortitsinerup saniatigut allanik pineqaatissiissusiisoqassanngilaq.

§ 43. Malittarisassani § 9 imm. 2, § 10 imm. 2, § 12 imm. 2, § 13, § 14, § 15, § 16, § 18, § 23, § 25, § 26, § 28

iim. 2, § 31, § 32, § 36 imm. 1 aamma § 37 tunngavigalugit aalajangersarneqarsimasuni aalajangersakkanik

unioqqutitsinerit pillaammik akiliisitsissutaassasut aalajangersarneqarsinnaavoq.

§ 44. Suliassani Inatsisartut peqqussutaanni matumani aalajangersakkanik Inatsisartullu peqqussutaat

manna tunngavigalugu maleruaqqusanik aalajangersakkanik unioqqutitsinerit tunngasuni

pinerluttulerinermut inatsimmi malittarisassat tunngavigalugit ujarlernertalimmik

misissuisoqarsinnaavoq.

Imm. 2. §§ 41-43 malillugit akisussaasunngortitsisoqarpat umiarsuaq oqartussanit § 36, imm. 2-mi

taaneqarsimasunit aallaqqusaajunaarsinneqarsinnaavoq pillaatitut akiligassanngortinneqartup suliassallu

suliarineqarneranut tunngatillugu aningaasartuutit akilerneqareernissaasa tungaanut, imaluunniit

aningaasat taakku akilerneqarnissaasa qularnaveeqqusiivigineqarnissaata tungaanut. Suliassap

inaarutaasumik aalajangiivigineqarnerata kingorna kingusinnerpaammik qaammatit marluk

qaangiunnerini akiliisoqarsimanngippat qularnaveeqqusiisoqarsimanngippalluunniit umiarsuarmi pigisanik

nalilinnik arsaarinnissuteqarnikkut tamanna naammassitinniarneqarsinnaavoq.

§ 45. Aktieselskabi, anpartsselskabi, andelsselskabi taakkuluunniit assigisaat unioqqutitsisuuppata taakku

taamatut isigalugit pillaammik akiliisussanngortinneqarsinnaapput. Namminersornerullutik Oqartussat,

kommuni kommunilluunniit suleqatigiiffiat unioqqutitsisuuppata taakku taamatut isigalugit pillaammik

akiliisussanngortinneqarsinnaapput.

§ 46. Inatsisartut peqqussutaat manna 1. januar 1995 aallarnerfigalugu atortuulersinneqarpoq.

Imm. 2. Tamatumunnga peqatigitillugu Kalaallit Nunaata imartaa eqqarsaatigalugu immap uuliamik

mingutsirmeqarnissa pitsaaliorniarlugu iliuuserisassat pillugit inatsit, tak. nalunaarut nr. 134 28. marts

1978-imeersoq, aamma immap uuliaanngitsumik mingutsinneqarnissaa pitsaaliorniarlugu iliuuserisassat

pillugit inatsit nr. 290, 7. juni 1972-imeersoq inatsisikkut nr. 312-ikkut 26. juni 1975-imeersukkut
allannguuteqartinneqartoq atorunnaarsinneqarput.

Namminersornerullutik Oqartussat, ulloq 3. november 1994

Lars Emil Johansen

/

Ove Rosing Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut